

**PM: Harga minyak turun 1 September**  
**Malaysiakini.com**  
**Aug 14, 2008**  
**Muda Mohd Noor**

Harga minyak akan dikurangkan pada 1 September ini bergantung kepada penurunan harga minyak dunia, kata Perdana Menteri, Datuk Seri Abdullah Ahmad Badawi.

Katanya, memang ada penurunan harga minyak dan ia akan dibuat bergantung kepada harga minyak dunia bulan Ogos.

Di samping itu, katanya, subsidi 30 sen yang telah diberikan oleh, kerajaan, dikekalkan.

"Bergantung kepada kekurangan harga minyak, nampaknya waktu ini harga minyak Alhamdulillah, bertambah murah.

"(Ada) harapan untuk kita kurangkan harga minyak...Saya senang hati dan kita ada kebolehan untuk mengurangkan harga minyak," katanya.

Menurut Abdullah lagi, kerajaan setuju menggunakan formula untuk menentukan harga minyak pada tiap-tiap hujung bulan, atau pada 1 haribulan.

Perdana Menteri memberitahu pemberita demikian selepas merasmikan kongres Penjaja dan Peniaga Kecil Wilayah Persekutuan dan perhimpunan penjaja Wilayah Persekutuan di PWTC pagi ini.

### **Mengenai Proton**

Mengenai Proton pula, beliau berkata, kerajaan menyerahkan kepada Proton untuk memutuskan sama ada mahu mengadakan kerjasama dengan General Motors.

Katanya, syarikat kereta nasional itu telah menetapkan bahawa ia akan memulihkan Proton supaya ia lebih berdaya maju.

"Langkah-langkah yang telah diambil, telah menunjukkan kejayaan. Kereta Proton telah mendapat pasaran yang baik," katanya.

Bagaimanapun, tambah Abdullah, Proton boleh berbincang dengan pengeluar kereta yang lain.

"Saya yakin Proton boleh memberi harapan kepada kita (untuk) menjadi pengeluar kereta nasional yang baik.

"Soal terima cadangan dari pihak lain, biar Proton tentukan. Saya mahu Proton yang membuat pertimbangan, bukan kita pertimbangkan dan suruh Proton terima.

"Ini hal perniagaan, biar pihaknya (Proton) yang menentukan," kata perdana menteri.

Sebuah akhbar melaporkan hari ini bahawa General Motor berminat untuk menjalin kerjasama dengan Proton.

Baru-baru ini, pembuat kereta dari Amerika Syarikat itu telah mengadakan perbincangan

dengan Proton, tetapi gagal mencapai sebarang persetujuan.

Kerajaan juga telah mengulangi baru-baru ini bahawa ia bersikap terbuka berhubung mendapatkan rakan kongsi untuk Proton.

Copyright © 1999-2007 Mkini Dotcom Sdn. Bhd.

Source : <http://www.malaysiakini.com/news/87781>